

湖南褒忠錄初稿



湖南襄忠錄初稟

殉團一

長沙府

長沙

團防殉難

張楚江字屏南河西都人從九職銜性豪爽善排解鄉里敬之
咸豐二年粵賊犯省城里人生員蕭大載倡辦團練楚江佐之
四年二月黃州賊由岳州上犯鄉村震恐會團防大臣曾國藩
自衡州移營省城外楚江偕里人丁銳義走大營乞援同知王
鑫奉委馳剿賊悉遁鄉里貼然三月賊復揚帆泊靖港分黨陷
湘潭四月官軍殲賊於湘潭國藩聞之遂督水陸之師沿河而

下水師直搗靖港陸師由新康登岸楚江率團勇四人爲嚮導行至五里牌水師忽失利靖港陸師望風而潰賊追至小河浮橋官軍畢渡楚江斷後賊用矛攢刺身受八傷入水而死團勇王亮彩殉餘三人免

丁滋義字益堂河西都人咸豐四年二月十四日賊犯縣境爲官軍嚮導遇害

劉輝夏字芳湖清泰都人團長咸豐六年五月十四日通城逸賊由湘陰長樂街突犯境時團勇星散倉猝未能集賊大索團長圍輝夏宅被擒不屈賊束縲濡膏灼其頭輝夏大罵賊怒殺之

團境遇害

楊孝欽字士鄰明道都人咸豐二年粵匪圍城官兵駐瀏陽小吳等門九月初三日孝欽往營貿易至清水塘遇賊八九人脅之去不可賊羣矛交刺身被十餘創而死首級被割

談滿明道都人咸豐二年九月初二日在港子橋遇賊八人滿持木挑與鬪傷數賊餘賊以矛刺之身受百餘傷腸潰而死熊光珩字石麟河西都人國學生在里以剛直稱咸豐四年二月黃州賊由鄂岳回竄長沙泊舟靖港分黨掠八曲河十一日賊八人突入室大索縛光珩將加撈掠光珩奮起繩絕奪賊刀傷一賊手眾賊刀矛交下罵不絕口而死

鄭先樸字久惺故襄陽府知府崇祀名宦敦允之次子未弱冠補弟子員旋食餼性循謹與人言抑抑自下人以大器目之咸豐六年五月賊何文彪由湘陰長樂街竄長沙十五日突至尊陽都先樸聞警遽匿母妻山中自歸避旁舍是夜賊宿於村大索見先樸儀觀俊偉執之不屈賊稱爲先生且餌以僞官先樸益醜詆賊遂遇害弟先械字小芝亦諸生爲人負氣高視於世常不可意歌哭不恆人以爲狂皆避之粵匪至家人爭避先械獨不肯去人強之則曰吾何畏賊哉俄而一賊闖其室先械取瓷盃擲之中賊腦驚而走羣賊繼至爭刺之死妻周氏隨夫亦不肯去賊旣殺先械周氏痛哭大罵賊並殺之

吳文思河西都人咸豐四年二月賊竄靖港文思遇諸塗直呼
爲賊賊怒殺之同時里人羅禎祥亦中塗遇賊被害
鄭世柄字司衡尊陽都人國學生屢應鄉舉不售鄉里有正人
之目咸豐六年世柄年已八十五月十五日賊將竄瀏陽經其
里人皆走匿世柄危坐家堂賊入指而大罵賊怒殺之同時族
姪孫先致亦被擄不屈遇害

朱宗鑫字次農錦繡都人咸豐六年五月十五日賊經高橋被
擄不從強脅至瀏陽黃土嶺遇害同擄者逃歸述之云

陳本立喻高才李世福繆自南符忠一繆品臣謝丙貴胡配三
楊國寶湯勝奇黃登榜黃宏遠楊光慶毛浩然黃滿湯大中繆

利仁繆三德黃德清陸如福符三寶均清泰都人咸豐六年五月十四日均以遇賊被害

善化

團防殉難

張國重白箬舖人家素封咸豐二年七月二十八日賊犯省城國重令子世恭與弟世信糾眾堵禦十月十九日賊由長沙遁至其里聞鎗礮聲驟來戰眾潰賊追至其家世恭世信及姪惟佺惟修塾師梁選吾雇工黃黼朝均遇害國重次子監生世寬子增生時澍季子世惠以護父故均受傷國重免賊退後世信婦楊氏哀毀自盡國重亦旋死侍郎曾國藩督辦湖南團防題

其門曰忠義之門

謝煥桂文童年十六與兄煥蘭同里侯彪團練里子弟堵嶽麓要隘賊自省城外過江夜遁煥蘭等督眾截殺煥桂與團勇余有朋謝中和葉其祥謝六藝皆力戰死

蔣大鵬字天池國學生咸豐二年奉示於縣屬黃土嶺主辦團練七月二十八日賊至遇害

張孝烈孝純咸豐二年奉示團練賊犯長沙於龍迴潭造浮橋孝烈等率眾毀之賊眾至孝烈孝純與姪友富均遇害

凌先肇河西人三敦團佐咸豐二年十月二十日賊由赤江分竄先肇率團勇三百人禦諸赤江團勇易餘慶曾福庭吳學澍

清江雜錄
李文章戰死先肇身受十七傷而亡是日均榮團勇劉有富有章紫庭亦於赤江被戕

張級昌琴昌兄弟均充團勇咸豐二年七月修築土城賊至被執皆不屈被殺同時有蕭五缺子者賊至同侶皆散蕭獨在賊問若何爲者缺子曰吾同築土城禦賊者也賊怒殺之

吳開成開榜均團勇禦賊於石馬鋪被殺

蔣大壽大學石馬鋪人咸豐二年七月陝西副將尹培立率陝兵營於蔣宅前大壽兄弟襄辦軍務賊至培立歿於陣大壽大學被執不屈皆死子姪運秀運爵運清運禮運鎧同時殉難曾華南門外團佐賊至死於立茂巷團勇死者杜金元張連元

是役各處團勇死者甚眾知姓名者張楚然及子光亮光盛張澤元蔣運高數人餘不詳

楊業培河西團佐勇禦賊於洋湖失利賊追之至金牛嶺老虎坡投水死

歐陽繼翥團總咸豐四年四月賊竄湘潭爲大軍所敗回竄繼翥率團勇追殺遇害

何宣輔均榮團勇咸豐四年四月賊道經團境隨眾堵禦而死

附錄

陳至生江西人貿易南門外市充團勇遇賊脅降不從被殺

團境遇害

胡良杰良秀兄弟家於南門外獨桅港咸豐二年七月兄弟應募修土城二十八日賊犯省垣遂逃歸至家則長髮四人已踞其室持矛攬雞鴨將烹之良杰僞喜迎之曰好客至矣奈有肴無酒請沽以來酒至賊酣飲已而腹痛覺毒刺良秀死良杰走賊追殺之門外頃之四賊皆死

譚國式洞井舖人賊犯省城經其地家人避去國式獨守舍賊入令具炊國式由屋後逃賊追之墜壕死

劉德茂亦獨守舍賊入索茶辭以無賊刺之死

黃紹蘭紹松靈官渡人兄弟應募修土城賊至均被殺其兄紹梅負母逃爲賊所得母年七十餘患痿疾紹梅抱之就便日三

四無倦意賊相顧駭曰此孝子也勸之降不從賊曾疑爲偵探叱斬之羣賊以孝子告乃釋之給以酒肉銀錢不受但請送母於鄉賊允之遂免

劉鼎新文童咸豐四年三月粵賊犯湘潭道經其門被擄賊誘降使司筆札不聽賊縛置馬上至湘潭界終不屈被殺

李懷忠李誠齋咸豐四年五月賊至被害李心思文童咸豐四年賊敗於湘潭回竄靖港道經邑西鄉心思被擄洋洋如平時出不意奪賊刀砍賊賊傷適羣賊至心思躍入水賊以長矛隨刺之死

郭尊銓字小峴乾隆甲子解元國子監學博煖之姪孫舉人燦

之孫也援例爲縣丞咸豐四年因籌餉獨捐錢二千緡郭氏世居長邑高橋六年五月通城賊由湘陰長樂街闖入尊陽都尊銑以足疾不及避冠服以俟賊叱爲妖已而知爲素封索貲不應以火熨之皮肉皆焦卒不應會聞官軍追且至賊急刦其十齡孤孫以遁行數百里復釋之歸抵家而尊銑以火毒潰死矣

附錄

陳自福湖北諸生寓省城南門外里仁坡其子充團勇咸豐二年七月賊至殺其子自福罵賊不休賊并殺之年八十

湘陰

黃森一名調璋字觀圭湘陰人居邑之東北鄉長樂里長樂爲

岳州至省會古驛道咸豐四年二月賊既陷武昌岳州不守急趨湘陰駐長沙之靖港復由水路掠船至新市踞長樂三十里有先人賊中者至是以長髮歸脅里人索錢米輸賊森故饒裕挈家去之已而里中錢米大集脅者取攜自如眾怒曰此僞也執而殺之已復大恐莫知所出里中周黃二姓爲多有從九周斐齋者抗言曰拒賊惟有團練耳然當推黃森森至慮無貲市民鄭之桂首輸錢千緡貲以漸裕出納皆森尸之卽日遴戶丁具器械立旗於門別練壯勇數百人分營要隘是時賊已飽掠而下巴陵土匪千餘人入平江之岑川聞長樂獨倡團練欲乘其未定破之日未明先以四百人往岑川去長樂五十里森不

意賊之猝至方與各團長會食賊已近里許矣急集練勇僅得五十人禦之山下小村其地長溝深柳蔽翳望眼突相遇於小橋間勇遽前刺死大旗賊一人又連刺紅衣騎賊渠囚大呼殺賊遠近皆應團勇益集賊疑懼不敢動已而大兵追殺數百人餘逃回岑川存不及半急遁走巴陵之新牆復追及之眾遂解散於是長樂團之名聞遠近森赴省報捷當事獎敘四人森得五品銜賞戴藍翎周斐齋亦給六品頂戴黃纓周朝祐并得縣丞從九等官纓森子朝祐斐齋子也五年六月賊渠何姓以數千人出巴陵毛田殺數百人至關王橋距長樂二十里而團勇已集他團亦爭赴之幾二萬人賊聞礮聲大起皆退去是時

賊常以一軍駐崇陽通城我軍屢人擊破之長樂亦時以團勇
隨剿及崇通賊退長樂亦費絀眾懈練勇遂罷而團亦不振矣
六年五月何賊復自通城入巴陵徑走長樂乘夜潛行緣嶺匿
谷居人不知也及見牧兒被殺山間始駭而集勇復見賊眾驚
潰不能成軍則皆率家屬渡水人南山賊亦不逼明日賊將渡
水而南水南地屬平江其人曾與長樂聯絡團事至是相聚禦
諸水上賊竟日不敢渡抵暮乃縱火燒市下走三十里始渡水
至新市殺千餘人初賊思乘虛襲長沙及長樂逗撓城已有備
賊不敢逞乃掠東境抄瀏醴萍鄉而去森以團事不終引爲愧
恥居常鬱鬱逾年疽發腦後死年五十一